

Schnitzelbank 2014 MC Kaltbrunn

In Gommiswald - nach der Fusion – wäge de Stüre – müends optimierä
E Chindergärtneri - sammt Mobiliar – muess weg – sie tüends üs offerierä
Händ meh Chind das Johr - müend alls neu chaufe - für vieli Franke
Mir in Chaltbrunn - händ profitiert - und säget – vielmal danke.

Jedes Dorf hets – isch stolz druf – uf ihre - Musikverein
Üebe dihei – ihr Prob – spielet möglichscht – lupe rein
Us Tradition – es Ständli – bi Wurscht und Brot – im Brändliguet
Als Lärmbeläschting – das bezeichne – brucht schu – echli Muet.

D' Chilepräsidentin – vo Uzne – tuet schu wieder - demmisioniere
Keis Problem händ mir – chönd sogar d' Arbet – mit Amde – intensiviere
Dä Presi vo Amde – findet üsi - Präsidentin – gar e netti
Führet sie - echt Vorgespröch - zur Fusion - under de - Bettdecki .

Verhandlet härt – kämpft für'd Sach – seit de Markus Schwizer
De Voralpeexpress – haltet nömm – fahrt eifach witer
D' Kantischüeler – müend neu - uf Uzne – go go chere
Platz hend mir- für d'Kanti Linth – Markus – tue di wehre.

Sit Johre chlönert Uzne – über de Städtverchehr – eimal meh – wird planet – neu analysiert
Uf alli Variante – händs reagiert – und Streckefüerige – verbaut und – zuebetoniert
Jetzt hän sie – kei Land meh – über Kaltbrunn – isch d' Alternative
Sogar am Übel – seiget mir d' Schuld – säget di Bürgerliche – naive

Das alti Poscht – Provisorium – es Ffürwehrmuseum – me chönt das dopplet nütze
En Jugendruum – het da nu Platz – nebe de alte – Ffürwehrsprütze
Dä Heiwehlöschzug – chönnt di Junge – leere singe – uf de Putz au haue
Dänn würdi d' Jugend – nümme – im Altersheim – dä Spielplatz versaue

Bim Stallbau – uf Alp Rote – s' Kaltbrunner Gwerb – gseht me det nur spärlich
Dä Material Transport - det ue – isch müehsam – aber nöd gfährlich
Gnueg Arbet händ's – ir Region - im Dorf – s' wird baut – wie susch fasch niene
Oder chönd di Gwerbler – bi Ortsgmeindbaute – zwenig Geld - verdiene

De Zahner Sepp - vom Rutzenacker - isch bekanntlich - en Bio Buur
Bi gwüsse Theme – kei Kompromiss – macht er – schaltet uf stur
Sis Land uffülle – mit Bauschutt – Grümpel – das nimmt er dänn locker
Vo dem Bioprojekt – läset mir – ir Zitig – s haut üs glat vom Hocker.